

## Inatsisartut peqqussutissaattut siunnersuummut nassuiaatit

### **Nalinginnaasumik nassuiaatit**

#### 1. Aallaqqaasiut

Tupanik pujortartarnerup peqqissutsikkut peqqinnermullu ajoqusiisumik sunniuteqarsinnaanera nalinginnaasumik ilisimaneqarpoq. Taamatut ilisimannittoqaraluartoq tupamik atuineq nunami maani annertoorujussuuvoq.

Tupa avatangiisinillu tupatorfiungitsunik isumannaarineq, kiisalu tupanik nioqqutissiat nalunaaqutserneqartarneri pillugit Inatsisartut peqqussutaatigut nr. 5-ikkut, 3. november 1994-imeersukkut peqqinnissaqarfiup tupap ajoqusiisumik sunniutaasa annikillisarneqarnissaannut ilungersuuteqarnera Inatsisartut peqqussutaatigut siullermeertumik malittarisassiuunneqarpoq. 1998-imi pujortarnissamut inerteqquteqarneq pillugu malittarisassat sukateriffigineqarput, 2000-imilu malittarisassat peqqussummik nutaamik akuersissuteqarnikkut sukateriffigineqaqqipput. Tupamik atuinerup annikillisinneqarnissaanik kiisalu pujortartarnerup peqqinnermut ajoqusiisumik sunniuteqartarnerata pitsaaliorneqarnissaanik killilersimaartinneqarnissaanillu siunertaq piffissap ingerlanerani allanngorsimanngilaq.

Pujortartarnerup ajoqusiisarnera pillugu ullumikkut annertunerungaartumik ilisimasaqarnermut Inatsisartut peqqussutaat peqqutaaqataasimavoq, ullumikkullu pujortarneq ajortut nalinginnaasumik innimigineqarnerupput. Pitsaaliuilluni iliuuserpassuit qaammarsaanerillu aamma iluaqutigalugit suliffeqarfiit minnerusut arlalissuit pujortarneq pillugu anguniakkamik erseqqissaanikuupput, angerlarsimaffinnilu mikisunik meerartalinni avatangiisinik pujortarfiunngitsunik pilersitsisoqarsimalluni.

2003-mi ukiakkut ataatsimiinnermi tupa pillugu peqqussutip atuuttup sukateriffigineqarnissaanik Inatsisartunut ilaasortat arlallit siunnersuuteqarput, aamma tupanik nioqqutissianik pisinnermi ukiutigut killiliinissaq kiisalu pisortat illuutaanni meeqqallu atuarfianni pujortartarnerup inerteqqutaalernissaa ilanngullugit. Siunnersuutit taakku Naalakkersuisut tusaatissatut tiguaat nutaamillu peqqussutissamut siunnersuusiorlutik pingaarutilitsigut annertuunik sukateriffiusumik.

Tupamilli atuinerup appartinnissaanut ilungersuuteqarnermi peqqussut kisimiittariaqanngilaq, ataqatigiissumillu qaammarsaajuarnikkut isummanillu

allanngortitsiniarnikkut tupamik atuinerup annikillisinneqarnissaa anguneqarsinnaavoq, taamaalillunilu inuit peqqissusiannik annertuumik pitsaanguisoqarsinnaalluni.

## 2. Peqqussutissamat siunnersuutip immikkoortuinut pingaarnernut nassuiaatit

Siornatigut pisortat illuutaanni pujortartarneq pillugu malittarisassat nalornissutigineqartarsimagaluartut aalajangersarneqarpoq illuutini peqqussummut ilaatinneqartuni pujortarneq inerteqqutaasoq.

Periarfissaavorli sulisunut ininik pujortartarfissanik pilersitsisoqarnissaa. Taamatulli periarfissamat ilaatinneqanngitsorpoq. Assersuutigalugu meeqqat atuarfianni, timersortarfinni, naluttarfinni, ulluunerani paaqqinnittarfinni aamma meeqqanut inuusuttunullu ulloq unnuarlu paaqqinnittarfinni pujortartarneq tamakkiisumik inerteqqutaalerpoq. Taamaattumik tamakkunani ininik pujortartarfiliisoqarsinnaanngilaq, inerteqqullu illup iluani aammalu silataani atuuppoq.

Allannguutit pingaaruteqarnerpaat ilaattut inunnu 18-it inorlugit ukiulinnut tupanik nioqqutissianik pisititsinissaq inerteqqutaalerpoq. Tamatuma peqatigisaanik tuniniaanerup pisiniartitsisumit pisinneqarnikkut pinissaa piumasaqaataalerpoq. Tamatumuunakkut ukiutigut killiliinermik nakkutilliinerup aqunneqarnissaata ajornannginnerulernissaa naatsorsuutigineqarpoq.

Siunnersuummut aamma ilaavoq tupanik nioqqutissianik ataasiakkaarlugit pisititsisinnaanerup inerteqqutaalernera, ataasiakkaarinnikkut tupap navianassusianik mianersoqqussummik nalunaaqutsiineq amigaataagajummat.

Tupamik atuinerup peqqissutsikkut peqqinnermullu ajoqusiisumik sunnuteqarsinnaanera pillugu mianersoqqusilluni nalunaaqutsersuinissamat usserummik nikotinimillu qanoq akoqartiginerinik paasissutissartaqartinneqarnissaannik piumasaqaatit aalajangiusimaneqarput. Taamaattorli paasissutissat tamarmik kalaallisut danskisullu allassimasarnissaannik erseqqissumik piumasaqartoqarluni. Peqqussummut maanna atuuttumut ilanngussaasimasoq nalunaarummik taarserneqassasoq siunnersuutigineqarpoq, malinnaatitsineq iluarsaaqqinnerlu ajornannginnerulissammata.

Tupanik nioqqutissianik pilerisaarutit pillugit malittarisassat peqqussummit atuuttumit ingerlateqqinneqarnissaat siunnersuutigineqarpoq, taamaalilluni tusagassiutini tamani tupanik nioqqutissianik pilerisaarinissaq suli inerteqqutaalluni.

## 3. Pisortanut aningaasatigut allaffissornikkullu kinguneri

Peqqinnissaqarfiup ataatsimoortumik missingersuutaanut naleqqiullugu siunnersuut aningaasartuutitaqanngilaq.

Tupatornerup annikillisinneqarnissaanik anguniakkap Namminersornerullutik Oqartussat akitsuutitigut isertitarisartagaannut qanoq kinguneqarsinnaanera pillugu naatsorsuisoqarnikuunngilaq.

#### 4. Inuussutissarsiotunut aningaasatigut allaffissornikkullu kinguneri

Tupatornerup qanoq annertutigisumik appsinnaanissaa tamatumalu aningaasatigut kingunissai missingersorneqarsinnaanngillat nalilersorneqarsinnaanatillu.

Inunnut 18-it inorlugit ukiulinnut tupanik nioqqutissianik tuniniaaqqusaannginnerup nassatarissavaa nioqquteqartut piffissaajaatigilissammassuk pisiniartut ukiuisa nakkutigisarilernissaat. Tamanna imigassanik aalakoornartulinnik tuniniaanermi maanna pisartussaavoq, taamaattumik allaffissornikkut kingunissai annikitsoralarsuussasorineqarput.

#### 5. Avatangiisinut pinngortitamullu kinguneri

Siunnersuut avatangiisinut pinngortitamullu annertunerusumik kinguneqassanganneqanngilaq.

#### 6. Innuttaasunut allaffissornikkut kinguneri

Siunnersuut innuttaasunut annertunerusumik allaffissornikkut kinguneqassanganneqanngilaq.

#### 7. Naalagaaffeqatigiinnermut namminersulernissamullu naleqqiussineq

Siunnersuut Naalagaaffeqatigiinnermut sunniuteqanngilaq imaluunniit annertunerusumik namminersulernissamut pissutaaqataanani.

#### 8. Pisortanik kattuffinnillu il.il. tusarniaaneq

Aningaasaqarnermut Pisortaqaarfimmut, Ilaqutariinnermut Pisortaqaarfimmut, Kultureqarnermut, Ilinniartitaanermut, Ilisimatusarnermut, Ilageeqarnermullu Pisortaqaarfimmut, Avatangiisinut Pinngortitamullu Pisortaqaarfimmut, Inuussutissarsiornermut, Nunalerinnermut, Suliffeqarnermullu Pisortaqaarfimmut, Akileraartarnermi Pisortaqaarfimmut, Peqqinnissakkut Nakkutilliisoqarfimmut, Peqqissaanermik Ilinniartarfimmut, Peqqissaaveqarfinnik Aqutsisoqarfimmut, Dronning Ingridip Napparsimmavissuanut, KANUKOKA-mut, KANUNUPE-mut, Pituffimmi Innuttaasut Siunnersuisoqatigiivinnut, SIK-mut, NAK-mut, ASG-mut, IMAK-imut, Kalaallit Nunaanni kigutit nakorsaasa peqatigiiffiannut, Kalaallit Nunaanni nakorsat peqatigiiffiannut, Peqqissaasut Kattuffiannut, Kalaallit Nunaanni Sulisitsisut Peqatigiiffiannut, Mittarfeqarfinnut, Sulisitsisut kattuffiannut ILIK-imut,

Air Greenland-imut, Arctic Umiaq Line A/S-imut, Umiarsuaatileqatigiit Allaffiannut, Kilisaataatileqatigiinnut (APK), Kalaallit Nunaanni Brugsenit peqatigiiffiannut (KNB), Pilersuisumut, Nuummi Niuertarfiutillit peqatigiiffiannut, House of Prince-mut, Philip Morris-imut, Kalaallit Nunaanni Sullivinnik Nakkutilliisoqarfimmu, Kalaallit Nunaanni Naalagaaffiup Sinniisoqarfianut, Kalaallit Nunanni Politimestereqarfimmu, Indenrigs- og Sundhedsministeriamut, Sundhedsstyrelsemu aamma Justitsministeriamu siunnersuut tusarniutigineqarsimavoq.

Uku akisimangillat: Inuussutissarsiornermut, Nunalerinermu Suliffeqarnermullu Pisortaqaqfik, Peqqissaanermik Ilinniarfik, Peqqissaaveqarfinnik Aqutsisoqarfik, Dronning Ingridip Napparsimmavissua, KANUNUPE, ASG, IMAK, Kalaallit Nunaanni kigutit nakorsaasa peqatigiiffiat, Peqqissaasut Kattuffiat, Kilisaataatileqatigiit (APK), Kalaallit Nunaanni Brugsenit peqatigiiffiat (KNB), Pilersuisoq, Nuummi Niuertarfiutillit peqatigiiffiat, Kalaallit Nunaanni Sullivinnik Nakkutilliisoqarfik, Indenrigs- og Sundhedsministeriet kiisalu Justitsministeriet.

Siunnersuut tusarniaassutigineqartoq ilaatigut imaqarpoq pujortartarfilersuinissamik piumasqaammik, taannalu annertuumik akerliuffigineqarpoq. Akissutigineqarsimasut tunuliaqutaralugit tamanna maanna siunnersuummi allangortinneqarsimavoq, taamaalilluni pujortarfiliisinnaaneq periarfissaalerluni piumasqaataajunnaarlunilu. Tamatuma saniatigut Hans Egedep Illua kiisalu pisortat illuutaanni ineqartut namminerisaminnik inaat inersimasuinnarnit najorneqartut, soorlu utoqqaat angerlarsimaffii innarluutilinnullu ulloq unnuarlu angerlarsimaffiit immikkut taallugit peqqussummu ilaatinneqangillat.

## **Peqqusutissatut siunnersuummi aalajangersakkanut ataasiakkaanut oqaasertaliussat**

### *§ 1-imut*

Aalajangersakkami erseqqissarneqarpoq peqqussummi pineqartut tassaasut nioqqutissat tupap naasuanit (Nicotianamit) suliarineqarsimasut tamarmik, taakkununga ilanngullugit sikaritsit, sikaat, sikaavaqqat, serutsit, imassat, tupat imusassat, sunoorsit, sukuluussat il.il.. "Il.il."-mik oqaasertaliinikkut tupanik nioqqutissiat nutaat takkussinnaasut ilaatinneqarput.

Peqqussummi ikiaroorntartut pujortarneqarsinnaasut ilanngunneqangillat, taakku inatsisini allani ilaatinneqarmata. Aammattaaq nakorsaatiit nikotinimik akoqartut, soorlu tyggegummit pujortarnaveersaarutiit, peqqussummi ilaatinneqangillat.

Pujortarnermi atorineqartartut atortut atortorissaarutilluunniit peqqussummi aamma ilaatinneqangillat.

## § 2-mut

Avatangiisit pujortarfiunngitsut pillugit malittarisassat Namminersornerullutik Oqartussanut kommuninullu taamaallaat tunngatinneqarput, aamma taakku suliffiutaat kiisalu Namminersornerullutik Oqartussat suliffeqarfiutaat namminersortitat ilanngullugit.

Namminersornerullutik Oqartussanik oqarnermi pineqarput Inatsisartut Naalackersuisullu, soorlu Kalaallit Nunaanni namminersorneq pillugu inatsimmi oqaatigineqartut.

Taaguummot suliffinnut ilaapput Naalackersuisut kommunillu eqqarsaatigalugit ilaatigut napparsimmaviit, ilinniarfiit, atuarfiit aamma ulluunerani unnuakkullu paaqqinnittarfiit.

Taamaattorli peqqussummut siunnersuummi ilaatinneqanngillat kommunit atorfeqartitaat ulluunerani paaqqinnittartut namminneq angerlarsimaffimminni sulisut. Kommunit ataasiakkaat tassaapput kommunip ulluunerani paaqqinnittarfiutaani inini meeqqat najortagaanni pujortartoqannginnissamik qulakkeerinnissinnaasut.

Namminersornerullutik Oqartussat suliffeqarfiutaannut namminersortitanut ilaapput ilaatigut Mittarfeqarfiit aamma Nukissiorfiit, tamannalu isumaqarpoq mittarfiit qulimigulinnullu mittarfiit peqqussummut ilaatinneqartut.

Peqqussummut ilaatinneqanngillat ilasseqatigiinnermut atorneqartartoq Hans Egedep Illua kiisalu pisortat illuutaat inersimasuinnarnit najorneqartut, soorlu utoqqaat angerlarsimaffii innarluutilinnullu ulloq unnuarlu angerlarsimaffiit.

Siunnersutip imm. 3-mi ingerlatseqatigiiffiit suliffeqarfiillu ingerlatsinerminni aningaasartuutaasa annertunersaat Namminersornerullutik Oqartussanit kommuninilluunniit matussuserneqartarpata, imaluunniit ingerlatseqatigiiffiit, suliffeqarfiit il.il. annertunersaat taakkunangga pigineqarpata, avatangiisit pujortartarfiunnginnissaat pillugu malittarisassanut ilaatinneqarnissaannut malittarisassanik Naalackersuisut aalajangersaanissaannut piginnaatinneqarput.

Naalagaaffiup oqartussaatitai Kalaallit Nunaanniittut, ilaallutik politiit eqqartuussiviillu, ilaatinneqanngillat, taakku danskit inatsisaat naapertorlugit malittarisassaqartinneqarmata.

Inuussutissarsiortut suliffeqarfiillu namminersortut avatangiisit pujortarfiunngitsut pillugit malittarisassanut ilaatinneqanngikkaluartut, taamaattoq avatangiisit pujortarfiunngitsut pillugit peqqusutip siunertaanik taakku malinninnissaannik Naalackersuisut sakkortunerpaamik kaammattuuteqassapput, taamaalillutik suliffeqarfiit ataasiakkaat pujortarneq pillugu aalajangersagaliorlutik sulisut pujortarfiunngitsunik isersimaarfigisinnaasaannik qulakkeerusseqqullugit.

### *§ 3-mut*

Illuni peqqussummi ilaatinneqartuni tamani pujortarnermik inerteqqut maleruagassanik maannamut atuuttunik erseqqissaaneruvoq.

Inerteqqutip kingunerisaanik assersuutigalugu torsuusani, ataatsimiittarfinni, sulisut nerisarfii, inini utaqqisarfinni, niuffiortut utaqqisarfiini allanilu assigisaanni pisortat illuutaanni ittuni illup iluani pujortarsinnaanissaq piomasaaqatigineqarsinnaangilaq.

Peqatigitillugu pisortat illuutaanni allaffinni, allaffinni arlaliuttakkani kisermaattakkaniluunniit pujortarnej aamma inerteqqutaasoq aalajangersakkami erseqqissaatigineqarpoq. Taamaattorli ininik pujortartarfinnik pilersitsisoqarnissamut periarfissiisoqarpoq, sulisullu taamaalillutik suliffimminni illup iluani pujortarnissaminnut isumannaarunneqarlutik.

Illup iluani pujortarnissamut periarfissatuaalerpoq sulisut immikkut pujortartarfiliunneqarnissaat.

Pineqartuni aqutsisut siulersuisulluunniit taamatut aalajangiisussaapput. Suliffigisami suleqatigiinnermut ataatsimiititaliap inassuteqarneratigut aalajangiisoqartarnissaa pissusissamisuusaaq, tassa suliffimmi taamaattumik peqarpat.

### *§ 4-mut*

Angallassissutit kikkunnit tamanit atorneqartartut pillugit eqqarsaatigineqarput bussit, umiarsuit, timmisartut il.il., angallassineq § 2, imm. 1-imi oqartussanit il.il. taaneqartunit isumagineqarpat.

Avatangiisit pujortarfiunngitsut pillugit siunnersuummi maleruagassanut inuusutissarsiortut namminersortut ilaatinneqanngimmata assersuutigalugu taxat peqqusutip pujortarnermik inerteqquteqarneranut ilaatinneqanngillat.

### *§ 5-imut*

Meeqqat atuarfianni, timersortarfinni, naluttarfinni, ulluunerani paaqqinnittarfinni aamma meeqqanut inuusuttunullu ulloq unnuarlup paaqqinnittarfinni pujortarnej inerteqqutaalluinnalerpoq. Tamanna isumaqarpoq sulisut atuartulluunniit ininik pujortartarfissaannik pilersitsisoqarsinnaangitsoq.

Pujortarnermik inerteqqut illup iluani silataanilu atuuppoq, tamannalu isumaqarpoq atuarfiit anitsiartarfiini, pinnguarterfinni imaluunniit atuarfimmu/meeqquerivimmu atasumik meeqqat najortagaanni pujortarnej aamma inerteqqutaasoq.

Taamatut pujortarnermik inerteqquteqarluinnarnermut tunngaviuvoq ilinniartitsisut, perorsaasut atuartulluunniit allat pujortarnerannit meeqqat sunnerneqarnissaat pinngitsoortinniarneqarmat.

#### *§ 6-imut*

Avatangiisit pujortarfiunnginnissaannik maleruagassat immikkut ittumik unioqqutinnissaannut aalajangersagaq periarfissiivoq. Tamanna pisinnaavoq immikkorluinnaq pisuni, soorlu juullimut atatillugu nereqatigiinnerni il.il. Immikkut akuerineqarneq akuerineqarallarneruvoq, pisariaqanngitsumillu sivisunaartariaqarani. Juullimut atatillugu nereqatigiinnermi immikkut akuerineqarneq nal.ak. 24-nut killilertariaqarpoq.

Inatsisartut ataatsimiinneri, ataatsimiinnerit, allallu aalajangersakkamut tassunga ilanngunneqarsinnaanngillat.

Avatangiisit pujortarfiunnginnissaannik aalajangersakkat sanioqqunnissaannut immikkut akuersisinnaapput pineqartumi aqutsisut, suliffiup siulersuisui, kommunalbestyrelset il.il., apeqqutaalluni taamatut aalajangiisinaanermut kikkut pisinnaatitaaffeqarnersut.

#### *§ 7-imut*

Aalajangersakkami piumasarineqarpoq init pujortartarfiit erseqqissumik nalunaaqutserneqarsimassasut, pujortarnermillu akornusersuinerit sapinngisamik minnerpaaffiiniitinneqassasut. Tamanna iluaqutaalluartumik silaannarissaateqarnikkut imaluunniit igalaakkut matukkulluunniit akuttunngitsumik silaannarissarnikkut pisinnaavoq. Naammanngilaq inimiit matu ammarlugu torsuusamut silaannarissanissaq.

#### *§ 8-mut*

Imm. 1-imi aalajangiunneqarpoq tupanik nioqqutissianik inuk pisiniaruni 18-inik ukioqalereersimassasoq. Taassuma atortinnissaa imm. 2-mi periarfissinneqarpoq, tassani aalajangersarneqarmat tupanik nioqqutissianik pisineq taammallaat pisiniartitsisumit pisitinneqarnikkut pisinnaasoq. Taamaalilluni automatit assigisaalluunniit atorlugit tupanik nioqqutissianik tuniniaanissaq inerteqqutaalerpoq.

Peqqussummi § 8-mi imm. 1 aamma 2 unioqqutinneqarpata § 14 imm. 1 naapertorlugu akiliisitsisoqarsinnaavoq.

Pisisup ukiuinik misissuinissamut akisussaasut tassaapput nioqquteqartoq pisiniarfillu tuniniaasoq. Tamanna isumaqarpoq pisiniartitsisoq pisisup ukiuinik pisariaqartumik uppersaammik qulakkeerinnissimangippat pisiniarfimmik piginnittoq/aqutsisoq akisussaatinneqarsinnaasoq.

#### *§ 9-mut*

Aalajangersagaq naapertorlugu tupanik nioqqutissiat ataasiakkaarlugit, assersuutigalugu sikaritsi ataasiinnaq, tuniniarneqarnissaat inerteqqutaalerpoq. Taamatut inerteqquteqarnermut ilaangillat sikaat, taakku nalinginnaasumik ataasiakkaarlugit tuniniarneqartarmata.

Taamatut inerteqquteqarnermut pissutaavoq ilaatigut sikaritsit ataasiakkaarlugit tuniniarneqarsinnaanerit inatsisinut naapertuunnersoq nalornissutigineqarsimammat. Manna tikillugu tamanna tupanik nioqqutissianik nalunaaqutsersuinissamut piunasaqaateqarnikkut malittarisassaqartinneqarsimavoq, tamannali kissaatigineqartutut sunniuteqarsimangilaq, minnerunngitsumillu meeqqat akornanni sikaritsinik ataasiakkaanik pisinissaq iluarineqarsimavoq. Taamaasiornissamut inerteqquteqalernikkut qulakkeerpeqassaaq tupanik nioqqutissiat mianersoqqussummik nalunaaqutserneqarsimasut nalunaaqutserneqarsimangitsulluunniit ataasiakkaarlugit tuniniarneqarsinnaajunnaarnerat.

#### *§ 10-mut*

Aalajangersakkap tupap pujortartarnerullu peqqinnissakkut ajoqusiisarnerata pujortartartunut ersarissumik takuneqarsinnaanera qulakkeerpaa.

Manna tikillugu mianersoqqussutit oqaasertaat akuerineqarsimasut peqqussummut ilassutitut ilaatinneqarsimapput. Tassunga taarsiullugu peqqussutikkut matumuuna nalunaarusiornikkut Naalakkersuisut aalajangersagaliorsinnaanerit inatsisitigut tunngavilerneqarpoq. Tamartumuuna mianersoqqussutit imarisaat oqaasertaallu nalunaarusiornikkut nutarterneqarsinnaalissapput, nalunaarutit Naalakkersuisunit akuersissutigineqaannarsinnaammata, akerlianik peqqussut atuuttoq Inatsisartunit akuerineqartariaqartoq.

Mianersoqqussutit imarisaat ilusaallu eqqarsaatigalugit EU-mi malittarisassat atuuttut sapinngisamik Naalakkersuisunit malinneqarput.

#### *§ 11-mut*



Aalajangersakkami siunertarineqarpoq tupatukkat usserummik nikotinimillu qanoq akoqartigivinnerinik paasissutissat pujortartartumut ersarissuusariaqarmata. Paasissutissat taakku kalaallisut danskisullu allassimasussaapput.

Taamaattorli tupanik nioqqtissiat sunik akoqarnerinik danskisuinnaq allannilinnik paasissutissartallit tikisereersimasat nioqqtigineqarsinnaapput.

### *§ 12-imut*

Aalajangersakkami aalajangiunneqarpoq tupanik nioqqtissiat pillugit pilerisaarutit tamarmik inerteqqutaalluinnartut.

Akerlianilli nunanit allanit atuagassiat il.il. inatsisitigut aalajangersagaqarnikkut toqqaannartumik ilaatinneqaratik, takuuk imm. 3.

Pilerisaarinermik ingerlataqarneq paasineqassaaq tupanik nioqqtissianik tunisaqarnerunissaq siunertaralugu inuussutissarsiornermi iliuuserisaaq sunaluunniit.

Imm. 2 tupanik nioqqtissianik pilerisaaruteqarnerup inerteqqutaaneraniq maleruagassamut ilassutaavoq. Tamanna isumaqarpoq tupanik nioqqtissiap aqqa atornagu allamik tupap aalajangersimasup suuneranut aqqanulluunniit eqqaanartumik atuisoqarsinnaanngitsaq.

### *§ 13-imut*

Pilerisaarinermik ingerlataqarnissamut inerteqquteqarnermut aalajangersagaq taanna tapertaavoq.

### *§ 14-imut*

Tupanik nioqqtissianik pilerisaarinermut inerteqquteqarnerup kiisalu tuniniaanermik nalunaaqutsersuinermillu malittarisassanik unioqqtitsinerit akiliisitsinermik pineqaatissiissutaasinnaapput.

Aalajangersagaq akiliisitsinertalimmik pineqaatissiissutaasinnaasoq inatsisitigut akisussaasumit unioqqtinneqarpat taanna akiliisinneqarnissamut akisussaatinneqarsinnaavoq.

### *§ 15-imut*

Siunnersuutigineqarpoq peqqussut 1. januar 2005-imi atuutilissasoq.

Tamatuma peqatigisaanik maannakkut peqqussutaasup tamarmiulluni atorunnaarsinneqarnissaa siunnersuutigineqarpoq.